

## DAVIES, GRIFFITH ('Gwyndaf'; 1868 - 1962); bardd, athro beirdd, a hynafiaethydd

**Enw:** Griffith Davies  
**Ffugenw:** Gwyndaf  
**Dyddiad geni:** 1868  
**Dyddiad marw:** 1962  
**Priod:** Kate Ann Davies (née Jones)  
**Priod:** Elin Davies (née Davies)  
**Plentyn:** Megan Davies  
**Rhiant:** Griffith Davies  
**Rhyw:** Gwryw  
**Galwedigaeth:** bardd, athro beirdd, a hynafiaethydd  
**Maes gweithgaredd:** Addysg; Eisteddfod; Hanes a Diwylliant; Barddoniaeth; Ysgolheictod ac leithoedd  
**Awdur:** Ifor Owen

Ganwyd 5 Chwefror 1868 yn nhyddyn bychan Llwynpiod, Llanuwchllyn,, Meirionnydd. Bu farw ei dad, Griffith Davies, cyn ei eni, a chafodd ei fam amser caled wrth fagu eu dau fab, Griffith a Thomas. Bu yn yr ysgol leol, ac am gyfnod yn ysgol enwog [Owen Owen](#) (1850 - 1920) yng Nghroesoswallt. Treuliodd ran helaethaf ei oes yn ffermio Bryncaled, fferm yn ymyl Llwynpiod. Priododd (1) Elin Davies, Bryncaled, Llanuwchllyn, ac yna (2) Kate Ann Jones, Bryn Coch, Llanuwchllyn, un o wehlyth John Jones, ('Tudur Llwyd') Weirglodd Gilfach, Llanuwchllyn, bardd a hynafiaethydd. Bu iddynt un ferch, Megan. Treuliodd Gwyndaf flynyddoedd olaf ei oes ym mwthyn Glan'rafon wrth droed Carndochan. Yr oedd yn ddiagon yn eglwys annibynnol Yr Hen Gapel, Llanuwchllyn, a bu'n aelod a henadur o gyngor sir Meirionnydd am 40 mlynedd. Bu'n islywydd Cymdeithas Hanes Meirionnydd, ac yn aelod o Gymdeithas Hanes Penllyn. Yr oedd yn gynganeddwr ac englynwr medrus, a bu'n athro beirdd gydol ei oes faith. Bu'n eisteddfodwr brwd, a derbyniwyd ef i'r Orsedd yn 1911, a bu'n annerch o'r Maen Llog fwy nag unwaith. Ysgrifennai'n gyson i'r wasg leol, ac yn achlysurol i'r *Tyst, Y Dysgedydd* a'r *Geninen*. Yn 1910 cyhoeddodd lyfryn bychan yn cynnwys ei awdl i [Michael D. Jones](#). Wedi ei farw, cyhoeddwyd, yn 1966, dan olygiaeth James Nicholas, gyfrol o'i waith, *Awen Gwyndaf Llanuwchllyn*. Bu farw 4 Chwefror 1962, ddiwrnod cyn ei 94 mlwydd oed, a chladdwyd ef ym mynwent newydd Llanuwchllyn.

### Awdur

Ifor Owen

### Ffynonellau

Gwybodaeth gan Megan Davies

*Awen Gwyndaf Llanuwchllyn* (Abertawe 1966) (1966)

Ifan Roberts

ac adnabyddiaeth bersonol

### Dolenni Ychwanegol

VIAF: [41610297](#)

Wikidata: [Q20804707](#)

Dyddiad cyhoeddi: 1997

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.